

Vun driveriver

erscheint auf www.lenauheim.de

monatliche
Erscheinung

August 2020

von Helen Alba

Vum hoche Schank zum Mauerschänkl

Un es kummt mei Reih, mol iwer unser schwowischi Schänk zu schreiwe. Ich bezieh mich jetz uf die Wertschaft meiner Großeltre in Bogarosch, wie ich se als Kind erlebt han. In der vorderschti Stub hat de hoche Schank gstann. Drin war es Gwand ufghong. Er hat awer ach Gfächer ghat fors Bettzeich, Handtiecher...

An der anri Mauer hat de Schubladkaschte gstann. In dene Schublade war die Unerwäsch gschlicht, dorte hat mer ach der Oma ihre Umhängtiechl scheen zammgeleet gfunn, Decke for de Diwan, Tischtiecher un Vorhäng.

In dere Stub war awer noch was – es Mauerschänkl. Des war halt e Loch in der Mauer, ausgeweisselt un mit zwaa Stellasche. E Tierl war dran, des war zugsperrt un de Schlissl derzu hat de Ota ufbewahrt. Mei Neigier, was dorte drin sin kennt, war schun als kleenes Kind riesengroß. Doch jedsmol, wann ich de Ota gebitt han, er soll mich ninschawe losse, hat er de Kopp gebeidelt un betont: „Du bischt noch zu kleen“! Doch wie ich schun greesser un verständlicher war, han ich endlich ninschawe derfe un de Ota hat mer erklärt: „Mei Kind, do werd alles ufbewahrt, was mol deem Klosi-Onkl ghert hat. Du weescht, er is im Zweite Weltkriech gfall. Mir wisse nitemol, wu oder ob er begrab gin is. For unser Familie is des es Andenken an de Klosi. Wann mer des Mauerschänkl ufmache, do kenne mer de Träne freije Laaf losse. Was do drin is, des is alles, was vum Klosi geblieb is“!

In der Kich war die Kredenz fors Gscherr zu finne, also de Kicheschank. In zwaa Teeler. Zu unnerscht ware die Phanne, Tippe, Weidling, Nudlwalcher. Zu owerscht die Tellre, Tipple, Tatzle, Gläser. Zwischer de zwaa Kredenzteeler war es Platz for de Wasserkruch, die Kaffeemiehl, Knowlsteesser.

Verschnerkelte Schubladschank

For die Kinner war de Hausbode oft e Fundgrube. Dorte war allerhand gelagert, was mer nit wechwerfe hat wille, was mer ach nimi gebraucht hat. Uf de Bode is mer leichter kumm, wie in de Keller. Weil dorte hat de Bodemsstrick ghong, an dem mer sich beim Nuf- un Nunerkravvle angehackt hat. In der Bodenstrapp hat es Werkzeichkischtl mit Zang, Hammer, Feil, Rewescheer gstann. Ach e alde Eemer mit Viehfutter war dorte immer bereitgstann un es Kerwl for die Aijer aushewe. Un ufm Bode war Frucht un Kukrutz gelagert. Ach die Zwiwle un de Knowl han dorte ihre Platz ghat. Mehlkischt, Schlachtmulder, Backmulder... des hat mer alles ufm Bode gfunn. Es ware Stricke gespannt, druf is die Wäsch zum Truckle kumm.

Ach e alde Schubladschank war ufm Bode. Dorte hat mer Schulbiecher, Hefter, aldi Kulennre ufbewahrt. Er war runderum verschnerkelt, die Schublade hat mer jedi mit zwaa Ringe rausziehe un zrukschieve kenne. Sie han gegärkst. Der Schank hat uf wacklichem Fuß gstann. Weil zwaa Stemple hat er nor noch vun vieri ghat. Die fehlende Stemple, des ware zwaa Holzsteiwer, die unergeleet ware.

Un wann ich jetz zu guterletscht zruckdenk, war in dem verschnerkelte Schubladschank villes ufghob, was mit unsrem schwowische Brauchtum zammhängt. Leider sin all die Beweise vun Mundart, Sitten un Vorfahre verlorn gang. Was stark schad drum is. Alles hätt mer heit gut gebrauchte kenne.